



16. august 2023

Inatsisartut ingerlatsinermut maleruagassaasa § 37 imm. 1 tunngavigalugu Naalackersuisunut ukuningga apeqquteqaateqarpunga:

Naalackersuisunut apeqquteqaatit:

1. **Umiarsuit takornariartaatit nunatsinnut aningaasanik isaatitsiffiunerunissaat anguniarlugu Naalackersuisut qanoq qulakkeerinniarpat?**
 - a. Umiarsuarnik takornariartaateqarnerup killilernissaanut suliniutissanik Naalackersuisut suliniuteqarnerlutik, taamaappallu taakku suuppat?
 - b. Umiarsuit takornariartaatini ilaasut akitsuusersornissaanut tulluuttumik suliaqarnermut Naalackersuisut sumut killippat?
 - c. Umiarsuit takornariartaatit ullumikkut qanoq aningaasatigut isaatitsiffigitigaagut?
2. **Takornarissat amerlasuut angallatinut akiliinikkut ilaarusuttarput. Angallatinut ilaanernut akiliutigineqartut akileraarutigut naatsorsorneqarneri Naalackersuisunit qanoq qulakkeerneqarpat?**
 - a. Angallatinik angallassisartut arlallit maani nunaqavissuunngillat. Taakku Kalaallit Nunaanni akileraarnikkut naatsorsuiffigineqarnissaat qanoq qulakkeerneqarpat?
 - i. Angallatinik angallassisussat angalaniarunik angallatit maani nunatsinni nalunaarsorneqarsimasunik kisimi angallassisinnaanissaannut Naalackersuisut suliniuteqarnerlutik?
3. **Nunaqavissut aallarnisaasut suliniutinut anginerusunut soorlu akunnittarfiuteqalernissamut aningaasanik atorniarsinnaanissamut periarfissaat suuppat?**
 - a. Nunaqavissut soorlu akunnittarfiuteqalernissamut aningaasaliisinnaanerat periarfissagissaarnerulernissaat Naalackersuisunit suliniutigineqarniarnerluni?
4. **Nalackersuisut suliamut tunngasunik paasissutissanik allanik paasissutissiisnaappat?**

(Inatsisartunut ilaasortaq Nivi Olsen, Demokraatit)

Tunngavilersuut

Takornariaqarnek nunatsinnut aningaasatigut isaatitsissutaavoq, kisiannili uummammiit oqaatigissagutsigu, nunami maani najugaqartuulluni takornariaqarfiunerpaaffiani nuannersuuneq ajorpoq. Uanga nammineq Ilulissani najugaqartuuvunga, illoqarfigisannilu inuttussutsikkut ikinnerussuteqalersarnek qanimut malugaara.

Umiarsuit takornariartaassuit tikikkaangata tamanna malunnarnerpaasarpoq. Matumani takusarparput takornarissat umiarsuaq ilaaffigisaminni najugallit, nerisut taamatuttarlu Ilulissani misigisassat akeqanngitsumik nuannaarniutigigaat. Tamanna annertuumik aningaasarsiutigingilarput.



DEMOKRAATIT
DEMOKRATERNE

Tamatuma avataasigut angallatit nunatsinni nalunaarsorsimangitsut takornarissanik angallassisut maluginiarsimavakka. Matumanilu aamma angallatit taakku inuiaqatigiinnut akileraartarnissaat qanoq qulakkeerneqartarnersoq eqqarsaatersuuteqarfigisimallugu.

Aammattaaq kalaaliusugut takornariaqarnikkut ingerlarsornermut peqataanerusinnaanerput ajornanginnerunissaa takorusuppara. Mittarfissuit ammariarpata takornariaqarneq annertuseriartussaavoq, akunnittarfeqarnikkullu, angallatit ilaalu ilanngullugit aningaasaliinerit annertuut pisariaqartinneqarumaarput. Matumanilu nunatta avataaneersut nunattalu avataaniit aningaasalersorneqartunik niuerfigineqarnerulernissaa ernumassutigaa. Taamaattumik Naalakkersuisut takornariaqarnermiit aningaasatigut isaatitsineq nunatsinniiginnarnerunissaa qanoq qulakkeerniarneraat paaserusuppara.

Ullut suliffiusut qulit iluanni apeqqutinnut akissutisinissara qilanaaraara.